

四庫全書

集部

欽定四庫全書

桐江續集卷二十八

元方回撰

乙巳三月十五日監察御史王東溪節宿戒方回
萬里飲靈隱冷泉亭趙宣慰君實趙提舉子昂
靈隱寺知事晦壇治具西方僧四人兩提領北
人放泉噴雪觀猿擲菓予醉先退賦詩五首記
之

年年時節美春三誰識湖山綠似藍萬戶棟梁雙語燕

千村桑柘兩眠蠶鼓鐘下竺寺連上香火北高峯勝南
除却咸平處士外何人更此築吟庵

淵靜濤飛亦壯哉冷泉亭右開初開一時變作跳空雪
萬衆驚聞噴壑雷老鶴遠過彭祖壽巨杉何啻盛唐栽
吾生八十重遊此身健猶堪酒一杯

世間春暖此間寒萬樹陰陰萬竹攢驄馬來遊人不避
畫龍誰寫我頻看餘生久已忘三黜高會猶容預四難
閒賞孤山梅五絕樽前剩愛一枝酸

休兵三十有餘齡鐵馬曾來似不曾寒士喜從賢御史
閒人許識老名僧畫船處處歌春雪厦屋遥遥貯臘冰
保得西湖如此好心知明首遇良肱

三月晴過半月春真成好景與良辰簪花騎馬多遊女
擲果呼猿不畏人湖山行樂有心賞天地太平無戰塵
兩紀逃名作閒客樂哉七十九年身

三月十八日甲子晴

夜夜春寒漸覺輕桐花十日過清明去年稔更今年稔

壬子晴兼甲子晴樓閣相望饒客醉干戈不用保農耕
老儒八十心無事依舊吟窓剔短檠

寄題畢氏鯉潭壽藏

陰德蒙泉日夜流使君鄉社號千秋方聞壽倒三松詠
遽作身隨一鉢謀誰謂滕公居此室何云文子樂斯丘
穴中得石如金鑒定有人封萬戶侯

讀太原王氏家記二首

卧冰公相舊家聲紀載鏗鏘樂九成大姓江山同久遠

雄文日月競光明
雙親强健躋高壽
兩紀休閒致盛名
冠豸澄清聊一出
萬鍾千駟未爲榮

中原表表日星垂
積善傳家泗水湄
一瓣心香鄒國廟
八分手筆嶧山碑
檢身粹行言相應
報國精忠孝可移
千萬人中無一二
庭闈偕老及期頤

三月二十九日飲杭州路耿同知花園

巢燕春泥久已融
虞絃節近鼓薰風
枝枝爛熟櫻桃紫
朶朶爭妍芍藥紅
冠豸霽威賢御史
雕蟲得雋老詩翁

十分蠶麥今年稔我輩何妨酒一中

立夏五首

吾家正對紫陽山南向宜添屋數間
百歲十分已過八只消無事守窮閒

齊侯北海楚南海匹馬扁舟我過之一事畧如陸務觀
囊中真有萬篇詩

說與江湖故舊知不曾得句未爲詩
一更一至五更五半是搔頭不寐時

路過偏嶺暑風涼草色連天七寸長無限牛羊無樹木
青青六月地椒香

南華六祖老盧能宇宙千燈復萬燈佛法平生吾不信
神交一二老詩僧

李仲賓墨竹四首

乾坤各各變三爻坎兌相依似泰交認得易中甘節卦
籀龍貞幹寫烟梢

春生夏長出牆頭含籀新梢玉版抽宜雪宜霜無不可

如椽且與貌宜秋

心空節勁翠筠濃
冷笑凡花誨冶容
可是人間秋水碧
東方七宿應蒼龍

渭川千畝入毫端
子美臨風野色寒
不是畫師即詩客
可能收拾與人看

送方仲和信州學正二首

洽曉山竹溪子秋崖姪

公論乾坤萬古留
秋崖秋壑兩般秋
尚思下惠甘三黜
肯向新都羨五侯
籍甚故家佳玉樹
彼哉亡國貼金甌

同鄉同姓仍同榜喜見烟中跨竈樓

科第官資異昔年束書聊憩玉山前師生講暇臯比地
兄弟吟高鴈字天虛谷宗生雙鬢禿秋崖家學一燈傳
向來晦靜相逢處諸老猶應有斷編

送柴廷玉靜得

爛柯峯下碧溪雲元自龜山一派分羅仲素初同此脈
朱元晦始張吾軍儻知柴氏潛心學未數徐魁徑畝文
近喜識荆靜得老名家知道更多聞

義犬行

古滕東溪御史王公之先公叅一檠十五載東
溪葬廬墓從至其地不食而死以古禮埋之紫
陽山方回賦義犬行

君不見周興西旅貢厥獒今日天下新建橐遠方不許
進異物閒却三畧兼六韜又不見王孫昔歎走狗烹今
日天下永太平保全功臣決無此花村夜不爭雉鳴陸
平原家養黃耳繫書不隔江淮水金陵音問還洛陽往

來何啻萬餘里杜少陵寓廊州居舊物低徊入衣裾宗
文宗武共入蜀愛憐想亦如相如古滕東溪王御史先
公豈第世無比一犬育之十五年送葬至墓不食死一
飯糟糠何足論恒飽不饑謝乾坤垂深井韁馬救主銜
明月珠蛇報恩世上紛紛輕薄子翻雲覆雨喪廉恥動
輒反噬不識人可似韓盧烏喙之徒知義理

送程桂軒子方還蜀治先墓

周宣中興常武雅程伯休父爲司馬其先重黎掌天地

此佐尹氏征伐者顏曾思復有七篇孰云軻死道不傳
洛中二程忽突起乃有明道與伊川西蜀名士古相繼
東坡外家亦程氏吾州紫陽此姓多宰相訥翁顯近世
倚哉古渝程子方年高七十彌健強子公禮甫侍入峽
灑掃松楸脩墓藏孝思祖考安遺體何惜往來萬餘里
曳裾岷峨山上雲鼓棹灤澗堆前水儒流不與常人同
何況此郎娛此翁自古搜詩得句處往往車中與舟中
夔州十歌劉賓客百花潭北子美宅二老遺蹤可訪尋

飛龍舞蛟轟霹靂五月重午離西湖九月重九超成都
盍簪之別澆菖蒲若堂之封醑茱萸小春早梅仲春柳
蜀地吳天兩俱有古渝何必卜故廬不如再飲西湖酒
走筆送吳僧慶間遊明越

挑包前日過垂虹明旦乘潮向浙東兩袖虎丘山上月
一竿漁浦渡頭風乾坤佛法元來盛湖海詩僧到處雄
而立妙齡廣長舌肯參八十紫陽翁

送康彥博文夫吉州教長句二十韻

廟廊謁賢飯吐哺留子翰林不肯住閻公大學今儒宗
邀子同宿玉堂霧曰我天南有嚴親滄澗旨甘奉朝暮
得一泮水廣文官匹馬扁舟遂南渡未愛紅藥當堦翻
但憶芝山攜酒句江東自鄱沂江西郡曰青原洲白鷺
歐陽文逮周益公誠齋詩傳楊長孺比戶絃誦家書燈
子往爲師異瓜戍人才爐冶入老手鏤錙干將由我鑄
即今場屋已無用五言省題八韻賦人心天理不可磨
秉彝物則常如故五天竺國身出神三蓬萊山臂生羽

緇黃引之入迷途殘魄零魂應悔誤
昌黎原道孟七篇除魃剋螭剔魚蠹
子當以此據臯比正正邪邪明舉錯
本根樹立謹心術節目設張行法度
子曾精讀萬卷書子又遠遊萬里路
諸生北面孰不服窮理盡性擺傳註
天民先覺敢自許作成後進定無數

學詩吟十首

併序

小子何莫學夫詩伯魚承過庭之問退而學詩
三百五篇之詩也詩亡然後春秋作詩有美有

刺導人爲善而遏其惡詩不復作孔聖懼焉故
寓褒貶於春秋以爲賢君良臣之勸而破亂臣
賊子之膽後世之詩自楚騷起漢晉唐宋至于
今日得洙泗之遺意否乎雖然天理人心一也
回近詩十首名曰學詩吟所見並具詩中或者
亦粗得前輩心傳之一二大德九年乙巳七月
初八日方回自序

我陟匡廬山想像淵明廬我遊永嘉郡康樂茲佩魚鱗

詩六十載鑽仰二老且白首恐無成嗟哉腹空虛邇來
擺百務糲飯幾無蔬朝吟極暮倣夜詠加勤渠不必一
字工意味但舒徐比陶似不足方謝尚有餘舉世無人
識歸歟吾歸歟

三百篇既絕孔聖作春秋榮辱繫褒貶與詩美刺侔楚
騷降一等尚可風雅儔漢盛出蘇李魏興起曹劉厯覽
逮六朝仰止茲爲優獨一陶元亮龍鳳翔九州韓柳繼
李杜黃陳紹蘓歐江湖近一種禽蟲鳴啁啾

我讀淵明詩不忍復去手休官四十一不肯戀五斗二
十三霜秋籬下作重九朝亦一杯酒暮亦一杯酒南北
幾蠅紫能爾一醉否義熙所以立寄奴幸而偶牧野誅
獨天夷齊尚弗取竊評首陽山乃後有五柳

我愛真西山讀書有甲記首論天命性豈可不論氣

程張

二說宋始有之

我愛魏鶴山周易輯集義濂洛十七家一貫六

十四有寂即有感槁死笑釋氏無氣欲爲人瓦礫棄骸
骨復見天地心有處起生意王弼獨云無此語決非是

楊氏昔爲我老子實似之墨氏昔兼愛釋迦亦如之孟子
闢楊墨有功此一時似仁與似義暗傳匪明垂梵語東
漢譯玄門西晉師迄爲萬世害三教乃並馳獨一韓文
公張我正正旗濂洛有諸老此盛彼遂衰

離騷謂絕響此道傳人心外物有鼎革能言無古今曹
劉與陶謝五柳擅正音李杜與韓柳一字直萬金歐蘓
與黃陳孰淺而孰深尤蕭楊陸范乾淳鶴在陰二澗可
繼之章泉亦駸駸奈何近百載種火灰中深

南渡後詩人尤延之

蕭千岩楊誠齋陸放翁范石湖其最也韓南澗澗泉父子可繼之嘉定以來止有一趙章泉耳回所見如此紫水心獎提永嘉四靈而天下江湖詩客學許渾姚合僅能爲五七言律而詩格卑矣種火灰中深回不敢謂世無人如灰中種火窮而在下不見知於當世耳種上聲種火俗語也

宋詩孰第一吾賞梅聖俞綽有盛唐風晚唐其劣諸牛尾狸無敵馬蹄驚與俱龍溪奏思陵此產臣鄉閭宣城二十詠歛浦俗亦如春洲生荻芽寄興河豚魚真言寫實事組刻全屏除黃陳吟格高此事分兩途

我寓侍郎橋夜枕聞五德四更即不眠東望逆曙色南

睨三茅閣千燈破暗黑百八仙林鐘鼉龍吼其北繫此
倚闌人四海誰我識未能朱晦翁鄉邦續道脉猶當陸
放翁桐江刻詩集

承天寺一碑宜州萬里走後山與簡齋各年四十九李
杜俱有厄郊島終不偶今人好作詩曾不鑒茲否我如
陸務觀平生詩萬首明年當八十不可日無酒四男異
甌釜二女欠箕箒曉問床頭甕僅有酒一斗

吾性能忍窮所以不仕宦兩紀加一載考槃歌在澗當

車穩杖屨當肉飽藜苳雖然鮮歡娛終不墮憂患憶昔
四十九奏書似臺諫請劒斬佞臣此賊罪惡貫脩忽三
十秋往事如夢幻不死踰八旬幾度見賓鴈

再送王聖俞戴溪

宇宙喜一統於今三十年江南諸將相北上揚其鞭書
生亦覓官累糧趨幽燕青原有王老歷世義獻賢自浙
而江淮北理彭城船不上郭隗臺不飲盧溝泉問之果
何徃徃陟泰山巔觀古封禪碑討究秦漢鐫森森楷木

林上香先聖前滕州孟子廟鄒縣有墓田我亦嘗過之
如親聞七篇羨君今勇往挿翅如登僊嗚呼古先哲何
以百世傳我等生後世倏忽銷如烟嗟嗟此何故男子
若婦然少游勝伏波此論何其偏七戰歿牖下畢萬自
有天誓死或不死求全終罕全吾聞溪中禽有曰信天
緣魚過得飽食終不流饑涎

獨立

午牕睡起懶衣裳獨立樓頭數過航苔蘚瓦連蒼暈古

梧桐簷覆綠陰涼北來話舊玉堂雨

汪漢卿翰林修撰六月三日至杭此

用孫內翰那更廉纖雨謾道玉爲堂事

西望懷人白筆霜

謂東溪王御史節直卿五月十七日

自抗還建康

自覺多思尚多事不如樽酒見羲皇

思家五首

憶昔年垂五十時紫陽山下結茅茨

予癸酉年四十七宇文信仲使君知

吾州買宋尚書故宅基見贈築室

閒花野竹三間屋

野草字不如野竹好然礙屋韻三間

屋太少千間廈又太多詩之難如此

皓月清風萬首詩得罪權臣常自笑

賈似道四令言路抨之

逃名市隱復奚疑壽登釣渭真慙愧不學

空令有四兒

湖海今非昔妙齡未容許
記識陳登歸心七里灘頭棹
客思三茅閣上燈雪裏梅香尋酒媪
雨前茶好待詩僧
近來衰老嗟何似怕啖杭州六月冰

世道駸駸似可哈多年吾已似銜枚
品題已定門人叛籍湜之佛

周種叛坡

王安石 議論方公敵國來

朱文公陸子靜

瓦礫敢侔珠玉價茅

茨誰辨棟梁材淵明歸去廬山下未少黃花酒一杯

弱冠吟詩六十年自然熟處有肥僊

誠齋晚愛肥仙詩自然何曾巧飾事

雕鐫回詩初學張

文潛晚參黃陳

坡翁追和陶元亮谷老深慙白樂天

苦李道傍人不採蟠桃海上事空傳
平心定氣求中道
佳句無窮在眼前

黃山三十六峰豪南照城樓百里高
五嶺舊坑金作硯

婺源五嶺中一谷產硯刷絲第一角浪羅
紋次之舊坑崩閉郡守謝登嘗開鑿不竟
雙橋新釀玉

為醪紫陽山西南山許宣平之故居下曰雙橋酒
素佳宣平負薪朝出賣沽酒日西歸此酒
浙鄉巨

艦供魚鮓淮郡駢肩致蟹螯霜後
牛尾狸兼馬蹄鱉消

得坡僊賦老饕餐

梅聖俞集宣城二十詠沙地馬蹄鱉雪天
牛尾狸獻亦然汪龍溪內翰彥章奏

答思陵問鄉味引此聯良是。嶠古未有漢吳王所嗜漢時吳都會稽東漢始分浙西爲吳郡

詩思十首

年甫弱冠而學吟詩新春將八十矣凡用六十年之工夫僅至此地俗人不識晚進不知自紀
厥事凡十

大雅嗟麟筆離騷嘆鳳絃猗那誰與敵羌蹇尚堪傳步
仰曹劉獨名歆李杜專無時吾不夢攜酒訪斜川

老子持公論評詩衆勿驚更無雙子美止有一淵明響

接東坡和肩隨太白名吾嘗圖畫像釋菜四先生

萬古陶兼杜誰堪配饗之赦還儋耳海謫死瘴城宜無
已玉堂凍去非榕嶺馳更添韓與柳欲築八賢祠

滿眼詩無數斯須忽失之精深元要熟玄妙不因思默
契如神助冥搜有鬼知平生天相我得句匪人爲

素甚鄙南嶽幸嘗忝雪牕格高爲第一意到自無雙倏
忽千軍陣雍容九鼎扛僧敲作手勢吾可賈長江

楊劉崑體變誰實擅元功萬古推梅老三辰仰醉翁穆

脩先漢筆魏野盛唐風今日何人悟江湖慟阮窮

俗子欺詩客詩成未易工虛聲難忝竊生理早窮空謠
詠無庸聽諄諄爾未通阮公青白眼畱取送飛鴻

忝竊嚴陵郡依稀陸放翁作詩踰萬首浪仕只千窮醉
卧三更後閒吟兩紀中時時落幽夢漁笛鑑湖東

茗溪漁隱老家在績溪東苦學多前輩評詩出此翁生
年同孔氏傳道仰文公爛却沙頭月誰參到此中

殿院胡公伸績溪人忤秦檜死靜江獄胡仔其子也
叢話善評詩寓書上

爛却沙頭月一船朱文公詩妙文公生年同孔子庚戌
亦年七十三此謂吾州前輩詩人今學者未參到此地
也

蛇起新州荻溫玄業不成已無司馬氏猶有石頭城北
伐中原捷南歸大物更菊花籬下酒萬古一淵明

題十六羅漢畫像

一釋迦佛起天竺羅漢五百又十六中華止繪十六僧
貫休十八老筆續千無萬無無更無芥子須彌一掃俱
阿字義門總深入畫圖豈止伐顓臾咄伏虎降龍兩尊

者此卷寫一犬如獅一仙鶴精妙絲毫無苟且筆墨游戲真古今劫火燃捲起短軸且飲酒西牕萬里開青天
題寒山拾得畫像

予讀寒山拾得詩集第一首城中嬌小女雜佩何珊珊鸚鵡籠中養琵琶月下彈長歌三日響短舞萬人看未必常如此芙蓉不耐寒此詩朱文公尤喜之今見二畫像而爲賦詩曰

我讀寒山拾得詩唐初武德貞觀時此必前朝老進士

開皇大業不仕隋長歌短舞芙蓉句開元元和尚無之
一簾天台國清寺掃滅人世貪嗔癡文殊師利復現世
僧俗未妨疑傳疑或題松下讀黃老臆辨二叟果爲誰
諺云橘皮錯認皮九方臯馬遺黃驪嗚呼甚矣吾衰矣
郁郁都都焉雄雌

武寧茶提舉相臺鄭君思恭之萱堂太夫人馮氏
大德乙巳年八十六紫陽山方回萬里年七十九
賦長句

孝子不願爲高官履危未必親心安孝子不願食厚祿
移此祿爲親之福親家堂上太夫人九九之筭饒五春
令郎江西三十載董提茗事職不改他人公台天上飛
我不衮衣但萊衣誰其總戎動百萬我寧不作麒麟楨
夫人愈老愈優游髮白返黑此之由夫人內丹保堅固
齒落更生此之故君不見莊椿一歲秋八千彭祖十分
之一焉夫人壽骨比彭祖尚餘七百一十有四年

題米元暉寒林

善書善畫古來希前輩風流日漸微開卷令人憶義獻
米元章更米元暉

九日

樓前樓後獨徘徊便當登高百尺臺海內共知吾輩老
江南未見菊花開細思去歲人誰健遙想中原鴈已來
我似少陵亦賒酒不妨剩舉兩三杯

次韻前往中竺希鑑上人五言

中興今佛法百倍勝儒紳達磨重初祖觀音再化身此

心元是道何物不爲塵轂鯨齊王眼焉知一角麟

送岳德裕如大都

岳忠武王炎興中才跨光世俊世忠人見百戰百勝功
孰知洙泗儲心曾姦檜收忍摧英雄秦賊之臭傳無窮
忠武馨香迥不同鬼神呵護垂箕弓子子孫孫有祖風
允文允武足臨容敦以閱樂詩書崇維德裕甫明且聰
昭文大學其宗公招之使來有秋鴻賢父賢兄笑顏紅
酌酒贐別浮金鍾有馬有車舟有蓬脯腊漣酪羊豕熊

藕蓮藜棗蘋蘊葑壘之俎之籩豆豐文賓詩客罔不從
軼祀而行氣如虹浙之西而淮之東中原廣大堯民雍
鄒魯齊趙森儒宮默會寸心豁雙瞳盧溝之水何溶溶
五門佳氣瞻鬱葱殿上日月朝袞龍馬億萬萬休戰攻
獵圍發蹤無舛縱海東青上天無穹天鵝腦碎飄虛空
書生匪我求童蒙橋門冠帶新辟靡六藝一經或一通
加之官爵與磨礱千里虎符百里銅君逮王京登丹楓
即需一命壽乃翁歸歟不見橘霜濃近在新年桃李穠

鶯鶯燕燕飛蝶蜂滿斟環坐繡芙蓉春滿一家和氣融
我有一言如藥石後生仕宦非所急明時用人畧梯級
况乃要路薦引密集賢翰林真可得我身自有本來物
官小官高何損益君家萬卷刻書籍此事乃一大功德
陶鑄青衿千百億歸而求之不鑿壁一燈可費十年力
然後自觀語與默一默浩養百蟲蟄一語九霄車轉霹靂

寄題暢上人文溪別業詩

并序

四明郡之北四十里有溪曰文溪禪僧暢上人

因以自號有別業花木泉石之勝大德四年庚子今信州路儒學教授戴帥初爲記又五年乙巳歙人通議大夫前建德路總管兼府尹方回

寄題長句

愛僧子尤愛詩僧千偈萬頌傳五燈寒山拾得兩奇絕
妙壓神秀盧慧能四明北郭四十里文溪之名四海稱
文溪上人貌古怪吟壇突兀高千層我雖未到燕坐處
想見薜薜縱行藤上之所陟聳樓閣星辰日月危欄凭

下之所種足鋤耒芋腹黍梁滿甑烝有時挑包大都會
省臺貴顯皆其朋紫陽山叟年八十吟號夜菴書秋蠅
厥今流俗所不齒獨肯惠顧談上乘門前車馬熱如火
兀坐相對森寒冰氣臭膈合風味似萬里可並橫坐肱
文溪文溪有別業松陰百穀禾千塍何當挿翅渡潮海
月門吾敲堂吾陞春華櫻李杏桃藥夏菓榛棋蓮藕菱
西風九日東籬菊十月早梅霜霰凝短才題詠匪騷雅
有愧蹇荒慚觀興公詩自是第一等紙上龍變青雲蒸

文溪有集定脫橐庶越韓門島可澄老夫所作豈敢並
鵬鶚風前跼凍鷹誰歟作記已六載敢不服膺今戴憑
題葉蘭坡居士蘭

楚詞之蘭惟湘中有之今之零陵香是也故韻
書春曰蘭秋曰蕙山谷之所謂蘭一榦一花蕙
一榦數花同開於春非也然今人從之久矣蘭
坡葉居士善寫蘭間以竹石殊古雅脫灑平陽
吳州判宗松巖以一紙見示爲賦之

一花一幹秀春風此論黃家太史公若問靈均舊紉佩
零陵香出古湘中

題畫龍首

掛龍西作但見尾舜服龍章臨斧依昌黎石鼎園蠢吟
此詩真可泣神鬼得非永嘉陳畫龍此紙錢塘葉蘭翁
走筆送僧宣無言歸泉南

杭泉三千二百里一瓶一鉢走桑梓此僧曾中有詩腸
一口吸盡四海水自從北海至南海搜詩直至珊瑚底

歸哉非爲戀鄉味橄欖檳榔紅荔子隻身家世無眷屬
亦不尋訪因即罷

音被四止

一欲追還李太白二欲中興杜

子美三欲扶起黃魯直四欲再作陳無已若島若可若
貫休直下視之眇糠粃名僧詩話六十卷我葺倡頌如
野史西天七祖南六祖畧如志傳與表紀尋復悔之泯
其藁間存一二笑狂斐幼讀紫陽先生書豈可捨之從
釋氏爛却沙頭月一船不妨文公漫隨喜可與言詩宜
與言不可與言姑止止

寄題松江下砂唐氏竹友

趙子昂書今第一竹友二字大踰尺結交此君者爲誰
松江其家吾未識想見髣髴如渭川千畝比封環乃宅
根竹可曾掘作鞭笋出不忍煮爲食青琅玕棲紫鳳凰
可待九成擊變石老夫客居杭州城一葦可航不三日
不問主人即直造誰知亦復有此癖夢到霜松雪梅邊
龜殼踞兮蛤蜊食取此三友并友之月明半夜吹長笛

題羅觀光藏陳所翁墨竹

容善畫龍
三山人

陳其姓名曰容稱所翁善畫龍葛嶺翹材酒杯客不分
虎不憑熊晚節寫此籀龍兒真是老筆善藏鋒我嘗遙望
識其貌古面無髯雙鬚蓬畫龍撒竹匪二技造化雖異
機軸同竹即是龍龍即竹鬼施神設非人工龍耶竹耶
勿惱我拓樓長嘯萬里天宇空

題羅觀光所藏李仲賓墨竹

以筆寫竹如寫字何獨鍾王擅能事同是蒙恬一管筆
老手變化自然異曾中渭川有千畝咄嗟辨此籀龍易

竹葉竹枝竹本根方寸中藏竹天地幼年癖好此亦頗
萬卷書右竹圖左妄希眉山蘓謫仙擬學湖州文與可
眉山一枝或兩枝湖州千朶復萬朶李侯有之以似之
袖手獨觀誰識我

追和東坡先生親筆陳李常見過三首

坡僂果何辜黃州七年客價高日月低名大天地窄嗟
彼舒亶輩豈不辨菽麥阿黨更妬忌一視皂與白

前後赤壁賦悲歌慘江風江山元不改在公神遊中三

經及字說胎禍垂無窮想如李常輩對寤三嘆同
我嘗過黃州故國聳喬木半山歌元豐此老蝸角縮及
至紹聖初嶺海謫坡谷人生歸去來破鑊煮黃獨

題文文山天祥遺墨

年踰弱冠唱楓宸海內文章第一人孰謂國家無厄運
從來天地有忠臣此聲不朽垂千古今歲猶存僅七旬
二十五年九原底剛風夜夜薄星辰

寄題沈可久雪村

吾聞昔人善賦梅嘗是夢中見春來前村深雪天未曉
焉知昨夜一枝開江村一雪復一雪三白豐年與玉屑
多事詩人要閒管想像高唐寫奇絕真曾質明杖屨無
前隨牧童後樵夫暗香何處費摸索寒生吟癖浩然驢
平生我有脊梁鐵明年八十凍不折卿用卿法自雪村
橫斜獨翫書窓月

題楊叔雅水墨百花圖

梅梢前後兩枝春百世中間各寫真忽見花王大如斗

始知天地有君臣

題坡僊求心齋三字

千聖相傳止一機
常惺惺法免危微
但於方寸求吾事
莫問坡書是與非

次韻芝田上人子虛二首

年長山僧五十秋
每攜詩卷過吾樓
老衰英妙心相似
靈隱亭前水不流

爲問葛藤禪律論
口箝舌結更無言
何如了辦眼前事

且說詩家不二門

劉子華儒吏

三十年前東南惟省吏出官爲正倅密吏出官
爲總戎部吏出官爲簿尉儒亦鮮矣監司州縣
吏皆不儒罰亦少苛今日吏始有儒爲之階是
而坐廟堂者多矣劉子華儒吏也幻住上人以
下爲說未有詩紫陽山虛叟方回賦之

短檠徹曉一燈寒
柳腹中藏萬卷寬
了事足爲良吏易

讀書真作大儒難隱身鴈鶩雖常調致位貂蟬可顯官
褒鄂功臣不須此長槍挽出進賢冠

寄題婺源戴氏蒼山歌 應虎文涪翁記

大蒼山小蒼山有若醉翁亭外滁山環萬梅萬竹萬松
栢萬巖萬壑超人寰河洛以來萬萬卷上至姚姒下孔
顏蠅頭細字藏數世晁張韓柳筆追還三道八韻果何
用時文之學久已刪星源幸有此一老妙齡早悟向上
關明年古希滿七十不知京洛有塵闌花間自與鶯蝶

賞菓熟朝共猿猱攀文人才士過從每樽酒樵夫牧子亦許
荆同班海內一統三十載書文車軌過荆蠻捐軒棄冕考槃
清朝乃容此士閒神僊窟宅何可到蓬萊弱水隔險巖
安得挿翅一飛往穿深憩密弄潺湲王摩詰心似可擬
陶淵明逕焉能扳既而思之各有分命所當得天不慳
大蒼山小蒼山此非百頃之家不能辦遊人未易窺豹
斑題詩寄往聊想像我有把茅獨蝸跼

題王義之雲隱

心天界限絕塵氛塵市雖喧耳不聞大隱從來非小隱
可須深入萬重雲

送呂主簿還任永豐

歲在庚申回自鄂漢下金陵依陸公太初曉
山因識南康呂公今主信之永豐簿胥會
于杭見贈古體詩二十二韻回亦爲二十
二韻餞公還任老嬾不能次韻斯之爲

媿

吾友陸太初擢第歲丙辰同舟下歙灘羣英對楓宸於
時程訥相中書秉洪鈞拔我魏靜翁丞郎廁朝紳明年
去其位出使洞庭濱回也實同行兩見桃源春已未入
江險鄂城飛戰塵近歲亡國相再造誇庚申金陵畱舉
子始獲識偉人公年二十三太初之館賓回年三十四
太初之鄉鄰四十六載別世事難具陳後歲公七袞明
年我八旬雪髯對舉酒談詩如有神健筆涸湖海便腹
羅星辰匪玉亦匪珠自有席上珍近世澆薄俗百偽無

一真二老舉措間復還天地淳醉鄉闢坦途永無荆與
榛傍觀果孰識無懷葛天民一邑主簿領內省忘屈伸
歸隱匡廬峯寄鴈或可頻

以讀書破萬卷下筆如有神爲韻賦十詩送趙然
然如大都

博學果何謂書不可不讀子思繼以審子夏繼以篤是
皆返諸心夫豈泥簡牘試一凭危樓萬里送鴻鵠

羲皇卦未畫世間有何書今人所校者惟亥豕魯魚葛

不洗肺腸求諸天地初此理儻有得萬卷皆空虛
所謂先天易諸人識不破獨一觀物翁入手不放過太
極是生兩然後品物播參以邵子言佛老義自墮

誤訓若稽古字至於三萬一言思無邪可以了羣怨世
人爾所有夜光珠徑寸吾儕道固窮君子兼山艮

揚雄論立師始於書一卷曾子貫忠恕本無書可傳趙
子足著述古今妙貫穿攷諸領袖間深衣有表襮

朱先之桑梓如我二人者趙子於吟詩一字不妄下虛

叟明八十碑砢老病馬年齡已衰頹文字亦苟且

妙年嘗自負韓子補天筆年及渭濱人今也老無力送
君如燕都誰門可長揖蘓舉黃自代靖翁獨我識

言詩卜子夏作賦馬相如三十六字母文公之四書知
君便便中自有一石渠以貌失子羽諸公其慎諸

魯語第一篇子曰即次有有子與曾子專美孔聖後乃
知古學者尊師復重友君之師友何殆不止韓柳

後生信可畏君年未四旬我老長空倍閒將三十春學

行各有見出處何必均寧將詩泣鬼肯與錢稱神

至節前二日

梅花買到滿樓香但笑吾家節是常雨凍不應無雪凍
未肩瘡更復有頭瘡近患月許桃符爆竹年將近繡線書帷
日漸長三歲嶺南江左路豈知八十客錢塘

至節後一日十月二十九日

倚欄閒翫老梧桐萬變真如一夢中竹葉滿斟今古了
楊枝早放是非空幼孤嶺海三千里衰病江湖八十翁

舊雨來人竟安在
邇來朋友馬牛風

至節前一日六首

少陵早是滄浪客
馬援真成矍鑠翁
四十五年忝科第
一生心與布衣同

征羌漢將趙充國
賜履齊侯周太公
虛叟紀年亦云爾
五湖四海一詩窮

燈前一影客中身
難未鳴時起已頻
每日盆梅千百擔
倚樓閒作看花人

蓴羹鱸膾鑑湖風想像依稀老放翁
惜爲平原多一出詩名元已擅無窮

客子光陰詩卷裏杏花消息雨聲中
我謂簡齋此奇句

元來出自后山翁

老形已具臂膝痛春事無多櫻笋來后山詩也簡齋詩本諸此然亦出於少陵翁也

心情詩卷無佳句時節梅花有好枝
較似后山更平澹一生愛誦石湖詩

贈魯至道

種薰不生猶種薺不生薰人力異培植
草木各有根或

不然此說宜以變化論蛟魚無頭角作龍行雨雲麴蘖釀成酒醒者皆醺醺不見昔諸子摠衣孔聖門仲由氣暴虎不使行三軍欲俾賜也訥故曰天何言不見孺悲子取瑟使之聞色黃而在裳深取六五坤志學及從心非變尚何云南山隱霧豹養其所變文明明德新民此書洙泗孫所謂新者何捨舊新是勤服可古衣冠耕須故田園世惟有舊染不可畱一痕變人先變已母我求道原下愚彼不移烏喙無蘭蓀昏昏與曉曉火蟄仍復

蟠人生悟此理寸丹還一元

寄題汪稱隱海陽船亭

望之有若船其實止一亭世情作風濤平地有滄溟中
裁宮室製外肖舳艫形片帆可萬里眇視蛟龍腥吾友
汪定翁積世家海寧海寧亦海陽難攷山海經季子棟
此宇世皆稱寧馨乘桴否運革作楫良辰丁漳饒兩分
教奕葉家檀青記者弘齋老文辭揺斗星不慕蓬萊島
不求楚江萍野水無人渡何時一揚舲

武林感舊又二首

錢塘多少少年人孰識迴頭迹已陳
綠草地元無綠草紅塵天更不紅塵
三茅觀頂燈猶在六部橋南塔頓新
試問衆生詩得意袈裟底下自由身

吳儂青蓋已云何郎罷猶能歎乃歌
湖上船稀西子老城馬響北人多珍烹
富戶金千埒負販貧民雨一蓑
倏忽虛盈三十載世間春夏幾南柯

桐江續集卷二十八

欽定四庫全書

集部

桐江續集卷二十九

詳校官中書臣孫溶

主事臣呂雲棟覆勘

總校官庶吉士臣倉聖脉

校對官助教臣胡予襄

謄錄監生臣孔繼峯

欽定四庫全書

桐江續集卷二十九

元

方回

撰

賦

汎湖遇雨戲爲短賦

柳絮化萍濃綠藏鶯不見其處止聞其聲此豈非春工
之極致歟湛然宴坐輕舟自行萬恣千態遠山縱橫透
疎簾而濕衣忽驟雨之若傾甫下矻而閉戶才頃刻而
又晴方子酒稍酣矣奮雪髯而慨慷曰此何為者耶悟

舒慘之不常於是誦臣并表忠之奏歌蘇仙薦菊之章
彼割據於五季若錢氏之數王渺邱壠之無迹愴松楸
其可傷涸銀海而出金椀穴狐兔而上牛羊豈不亦雄
傑一時兮終若雍門之泣孟嘗賦梅處士妙解影香骨
可以腐千古不亡鬱孤山其碑砢擁萬樹之青蒼罔蔗
節之遺恨保故封猶若堂天道茫茫一雨一暘榮悴隆
替柔剛微彰謂偶然不足芥蒂兮曰作善降之百祥謂
理有必可恃兮曷顏天而跖長二客白李遨頭曰張嘖

無故而多事擬陳迹而揣量指金叵羅其猶淺舉大白而罰之觴方子曰不然老陰為六老陽為九老則必變如翻覆手惟知變者可與長久知六之變固乃所守知九之變健不為首顧此湖中之舟與舟中之人豈長壽而不朽能畏謹以自修庶吉亨而無咎幸乘時而過分負且乘兮致寇環綽約之蛾眉佩金印而如斗管絃沸其前後緋紫奔其左右一旦不能自保卒同歸於石友蠹苗竄於三危防風橫於九畝或裸體以罾魚或跣足

而踏藕侔帶索之榮公甚泥塗之絳叟立層冰而弗寒
野姑僅其適口無樂亦復無憂不自知其不偶豈不勝
於孟晉而疾顛者乎此莊子所以不爲廟犧而李斯所
以憶上蔡之狗也舟且抵岸悉闢其牖賦詩各成肴核
再取有化為無無生為有雨晴晴雨紛揉結糾斯時也
度夕陽猶未至於百多言數窮姑相與大笑盡樽中之
酒

山水圖賦

大海四周濤波涌兮沃日蹴天魚龍洶兮其中有山千
峯聳兮崖懸壁峭石籠嵒兮雲翳霞鬱祥飈頌兮瑤草
琪樹紛華萃兮神人所宮萬斗拱兮連樓傑閣虹梁竦
兮觚稜金碧甃琅玕兮幡幢翩翩毯罽氍兮翥鳳翔鸞
舞翠孔兮奇葩異薦蔚以蓊兮深闈穹殿誰主董兮其
如北辰衆星共兮綬珠組玉佩鞞琤兮鐘雷鏞霆萬石
重兮雕甍文簷鱗鬣動兮妙音鏗鏘歌囉噴兮瓊以為
漿流乳潼兮有觴之者纖纖捧兮蟠桃其果西母種兮

如瓜之棗羌嘖嘖兮七十二鴛觀窺擁兮頽以自持或
矜寵兮何脩至斯獨高拱兮九州博大一蟻螻兮金童
應門吠仙獫兮舟何從來於岸攏兮松間之竊雪毛茸
兮伸首水湄龜五總兮自有宇宙皆古塚兮此獨不死
無邱壠兮萬姓寒飢靡缺乏兮五運代謝常固鞏兮嗟
今羽流費鉛汞兮非不欲往不可勇兮亂曰紫陽老子
既為此賦恍惚盧胡醉乎夢乎豈其蜃氣之所為乎客
曰不然昔有異人在蜀成都少尹值之自言其能需酒

一壺片梓如扇刻以指爪遂成此圖過江百年萬事埃
盡此物亦徂雖有百贖不亂一真在人識諸嗚呼此杜
子美所謂咫尺應須論萬里者乎此蘇子瞻所謂人間
何處有此境者乎攷運世之開閉兮萬有終焉一無其
有其無莫可以竟究兮姑寓意於游戲以誑老眼之模
糊

弔鶴賦

子實子築屋西湖之西據乎南高之峯泉石奇崛煙霞

疊重有鶴飛來不知所從賢主佳客歡然相逢豈幽心
之有感而適相值於箭鋒者乎朝出於野靡羅靡網夜
棲於室不樊不籠出沒遊戲菰蒲蓮稻翱翔掩映杉櫟
竹松立乎堦祀苔蘚增色依乎牕牖藤蘿改容人與物
其殊途可鷄鷩而鐘鼓彼傾國之妍姿紛嬋施之楚楚
魚若鳥兮見之颯深逝而高舉亦有德既輝而鳳來機
已忘而鷗下乃神理不可以常論者此所以夔擊石而
百獸舞也歟我嘗訪子徘徊茲山子之出矣何往白雲

鐫其門關須臾見子扁舟言旋烏帽瀟灑玉佩瓏珊三
賢之樂天畫像八公之劉安容顏是鶴也方搏風於九
霄之上睨八極而盤桓即斂翮於碧落迎先生於岸間
銜芝草而若獻尾瓊琚而上瑤壇望之者以為三神山
之人渺乎其不可攀者也試嘗相之淮南有術稟氣受
精金九火七西方素全體白南方朱元首赤中宵不寐
聲聞九里污泥不染脛高三尺小變大變歲百六十千
六百歲飲而不食與九疇之禹龜偕後天之罔極子實

子曰不然龍至靈也龍骨入藥麟至瑞也麟膠續絃使
樓句而不骨何居蔡而卜旃讀華陽之痊銘知胎禽之
有疇疇昔之夜吾鶴已仙鼯鼠食郊牛之角螻蟻困江
湖之鱸餓豺狂獬喋血垂涎豈兵解與水解猶形化而
神全嘻其不可得而見矣霜天嘹唳月地翩躚將造化
之謔我乏揚州之腰纏抑以我無乘軒之寵以故出陽
神而邀紫烟也側頂聽基從今已而忍哉俗物劈琴煮
之彼吠彼走猶有蓋帷乃葵以櫛乃樹以碑曰華亭貴

種青田上士之墓子其爲我申之以挽詞子虛子乃弔
之曰古之壽者廣成彭祖即今安在終亦爲土墮牛山
之淚駭乎哉齊景公求不死之草愚矣哉秦皇漢武凡
厥含靈陰母陽父智愚貴賤鱗介毛羽以氣相禪均厥
哺乳穉化而來老變而去一變一化有若寒暑或短或
脩魂游質腐豈其生生不滅而充塞宇宙者哉汝鶴昂
藏氷峙皎潔玉立嵒紹之雞非羣王喬之鳬匪匹無怨
可報空長越王之頸所欲易足肯折陶公之翼是嘗飴

潭臯之粟來自塗脩之國者耶是嘗爲丁令威遼東來
歸而以喙為筆者耶是嘗備三茅君之騏驎出於胯下
而恥為之役者耶是嘗以九轉還丹之使賦之以鮑照
而畫之以薛稷者耶汝苟知戴聖之誚鸚鵡又焉取郭
璞之笑蜉蝣視瘦軀若蟬蛻獵太清而天遊繫聽經之
蝙蝠及坐化之獼猴儻釋氏後身之可信未必不轉為
仙聖之儔子實子寧不知趙鐵面成都之清蘇玉堂臨
臯之樂充斥宇宙之大名陶冶江山之高作豈畱情玩

物之謂皆適然而有斯鶴偶得之而偶見之初無執而
無著鵝入右軍之籠雞解少陵之縛邂逅遂成於故事
豈有心者之可學怵於內者好龍而懼雲蔽於外者逐
鹿而迷嶽惟達人大觀碎千金之璧猶破釜曾不錯愕
棄三公而灌園固知其為儻來之人爵也而況於一玩
好之微豈於此而有適莫乎亂曰塞翁之馬失兮未必
不為福兮虎取驂以逸兮愈與暑俱吉兮青天無路可
追尋一片閒雲萬里心華表柱頭人去後恨無消息到

如今聊復追賡李遠之吟

李道士遇異人賦

鄞郡之東溟海之岸太白山曰此鬼谷子左元放之所嘗棲止者焉實出於古父老之相傳而吾何以知其然噫指李為姓之道士歷此山而攀緣披榛斲藥抉石漱泉朝挹丹霞夕嘯蒼烟似夢非夢茅廬數椽童子出戶長揖而言曰汝豈非所謂登瀛者乎道士方恍惚而莫詮沈吟之際緩步之間復遇異人羽衣翩躚擅雲袖

而呼之汝登瀛其來前蔭松覆柏狀鼇肖龜厥廣三尺
一巨金蟾駭聞見之謫誑斂形體而跽拳既意喻而色
授忽儻惘而變遷夫三神蓬島是謂瀛洲秦皇漢武望
洋而嘆旃蟾居月窟其宮廣寒世之人徒想像流聞而
已未有能拭目而窺觀者也嗚呼噫嘻使褒博者流立
說以號於世曰吾遊吾神揭泗水升孔壇手獲納履耳
聞鳴絃肩拍由求目接淵騫則豈不大噱而見鑄乎道
士之為學也談虛說空探冥冥窮玄玄無鬼而為有鬼

無仙而爲有仙非有倒傾九河之辯舌曾未易與之相
磨研也則不若一付之於滑稽與夷堅抑此道士之厥
祖嘗翊靖而相炎碧玉環之世曹耿青史其蟬嫣又何
異乎薛忠惠之孫見嘅於老學庵之編然則視耕稼鄭
公莊者則猶賢矣焉知其終不丹成而登天

松鶴詞 并序

世之植物如槿華朝榮暮悴而有千歲之松動物如蟻
螻蛄不能瞬息而鶴亦不啻千歲是故方外之士貴

之今夫松下苓上絲堅貞傲霜雪蟠屈肖龍蛇清吹搖
動常聳然於塵壒之外鶴青田之種華亭之唳故仙人
相之有經輕舉之士跨之以遊四海者也今之寫真者
必喜繪羽衣綸巾之徒徜徉松鶴之間唐人有詩曰祇
應松上鶴便是洞中人言其標致之相似也又曰養雛
成大鶴種子作高松言脩心鍊性之人可以長生久視
能與松若鶴俱壽也杭宗陽知宮天台陳悅道其門弟
子稱爲松鶴真人長身而古貌言嘿而神閒為之詞曰

千桃李之穠華兮不如我之孤松彼眩三春之朝露兮
我專一邱壑之風聽此以洗耳兮又何有乎牛鬪之聰
百鶯啼兮萬蝶舞不如我獨鶴兮襍其羽顧月池之
在地兮各以影而自侶九轉砂成兮鶴頂同丹我鬢不
凋兮松鬢長青何十八公之為夢兮胎僊夜鳴醉魂醒
亦貞其心兮亦癯其形與我作朋兮俱千齡

愛蓮堂雙蓮賦

爲泉州市舶唐
提舉伯榮賦

天地始判太極兩儀曰一生二老氏講之凡厥草木始

生之時一芽兩葉一核二枝豐年之瑞民乃無飢乃一
稻而二穗乃一麥而兩歧一花而結雙梅加以鴛鴦之
號一笋而挺雙竹誇夫鸞鳳之姿毀譽不常俗言厖辭
甚者沅陵六櫓酒泉十柰總一蒂而稱奇而又僻壤遐
域未易究知我則謂兩手十指同一肝脾人惟一心而
兩鼻兩耳兩目兩眉蓋此身血脈貫通則一為兩本兩
為一用可以類推物格於和氣而秀異則一者雖殊至
於萬而始於兩而所謂兩者終於相合而不相離乃家

天下人中國之鎡基也緊茲蓮之獨柄兮其端並華而
匹實一荷葉之所依兮一藕根之所出初紅藥之交艷
兮陋對鏡之新粧玉連環而不可解兮尋角立其青房
羅襪生塵金屐步兮前若後其芳躅腴吾膺而不悔兮
肯媚匪人之足彼釋子之寶宇兮三其座而跣趺辱於
次且之臀兮寧合志而霜枯牽牛織女天有星大孤小
孤地有山伯夷叔齊採薇巖間人亦有之曰若是班耦
嘉競爽儷美抗衡鄙爾叔孫魯國兩生廣受之退勝舍

之清元方季方難弟難兄機雲靈暉詞翹詠英三王勃
勔五竇輩萃奎聚之後復有二宋二蘇而二程持是以
方茲蓮之菁菁蓮若曰可者吾與之肩隨不可者將莫吾
之敢京也矧愛蓮之主人兮甫其字曰伯榮觀南海之
襍貨兮忽中輟乎宦情曰畫錦其有日兮隱胥濤之故
城築圃環夫菰蒲兮汀洲況夫臨平羌叔出而季處兮
極嗟予之至誠篤友于而共被兮決不摧乎紫荆異然
其而煮豆兮肖在原之鵲鵲感喁喁之效祥兮各其夢

而共莖三槐多一兮嬋厥茂五桂減三兮同爾貞亂曰
騷翁墨徒評葩嘲卉或繇或條同心連理脂塗粉傳婦
容是擬我獨不然削冶刊膩娥皇女英弗取為比而況
於二趙二喬之瑣尾者乎故專以大丈夫賦茲蓮不然
則何以謂之花君子

海東青賦

大德三年己亥七月十三日皇帝命榮祿大夫高公興
為浙江等處行中書省平章政事五年辛丑二月十九

日驛使爰來有海東青之賜於杭之錢塘門外昭慶教
場遺基築亭鑿池以養之紫陽方回撰賦一首拜手稽
首言曰詩不云乎涼彼武王變伐大商羌削平乎江南
一四海而康莊旣聖神又文武兮仰於赫之先皇詩不
云乎維師尚父時維鷹揚大元亦有其人兮森天矯以
騰驤亦非熊而非羆兮視周室而有光詩不云乎假樂
君子率由舊章維嗣聖之龍飛兮儼四方之紀綱宴安
民而官人兮受福祿兮無疆詩不云乎鳳凰鳴矣于彼

高岡茲舊人之是用兮闢四門而排闥奮羽翼而橫絕
兮鬱畱皓其相望緊海東青之為物兮產倭兒之殊鄉
氣吞鵬鯨兮鷺百鵬鶚眼流星而掣電兮勁翮刷夫秋
霜遼東之東兮一夜渡海數千萬里兮頃刻翔彼天
鵝之峻極兮磨日月於九蒼青一舉而直上兮擊其腦
而流漿鵝有時而亦點兮欲落地以潛藏青三左而三
右兮徑殞之於沙場萬騎睨其墜處兮羣駿奔而取將
極腴甘之可口兮匪人臣之敢嘗供九重之御膳兮曾

不數夫駝羊萬乘躬幸於獵數兮據玉鞍而飛驪驪相
此青之爪若觜兮猶忠臣烈士之材良天厨竊飼之禁
籜兮珠臂鞬其顏行國家賴英傑之力兮其報亦有以
異乎尋常猗我定翁武烈傳芳簾垂元祐族大以昌克
佐聖元紀於旂常南斗之南窮夫海洋千百頭其鰐魚
兮迎公舶而徜徉凡天戈之所指兮威振武夫八荒沐
雨露以潤澤兮胥枯起而槁昂占臘遲而閤婆兮俾悉
梯而悉航歲在辛丑春日載陽乃錫此青來自上方寺

扁昭慶門出錢塘乃毓此青羶肥臙腳不築夫亭之高
兮何以為青之煥不鑿夫池之深兮何以為青之涼萬
品植以名卉兮千株培以垂楊累洞庭之柑橘兮挺渭
川之脩篁有梧桐松檜柏兮有芋蔗茭菰薑有蟬蜂蟋
蟀而蚺蝶兮有鷗鷺鷓鴣而鴛鴦鹿麋羔犢騾驢馬兮
草為枕藉藥苗為糧螺蜆鼈龜鰕蟹蛤兮鱖鰣鱸鮓鱸
鯉魴環七墩而鼓舞兮萬頃浩其汪汪匪娛己以自樂
兮縱遊觀而豈遑敬至尊之所賜兮方寸咫尺乎巖廊

念此青之號海東兮越十洲三島之渺茫豈三足鳥之
精氣兮鍾異稟於扶桑日本歲以充貢兮尾高麗扶餘
而樂浪自元貞而大德兮紹烈祖之追相厥黻獻於西
旅兮來白雉於越裳致獅象於阼貉兮舞虞廷之蹌蹌
斯物取其擊搏兮節鯁直而性剛精衛欲填夫海波兮
均之軀眇而心長貂之微兮能入虎耳化龍之蛇兮鶴
乃可戕天生一物兮制夫一物後有弧矢兮前有豺狼
想此青之大志兮吸擒月蟾而醢其腸君賚臣兮有深

意臣報君兮永無央食吾芹敢獨美兮宜一飯而不忘
亂曰始浚西湖者李公泌續廣西湖者蔡公襄白公樂
天之井佛家德水蘇公子瞻之堤名伯甘棠與我高定
翁之海青亭五賢姓名千古香

銘

書隱齋銘

并序

天目山洪君起堂求文識其書隱軒紫陽方回謹言君
家先大父端明公平齋先生寶慶初為濟邸事斥史彌

遠歸隱於書者十餘年端平甲午遂出為臺諫第一人
淳祐辛亥回以左史呂公竹坡先生書謁君先父端明
後峴先生於在所時為考功郎兼直舍人院以煩言去
尋入天目山從之游館於至道官時挽至飲席以所讀
書字字行行指示所謂肯綮節目教之一日座間偶及
淮閬賈似道姦詭詐譎特甚謂異日必誤國其先見之
明如此世所不知今世所傳公與賈不合在淮東漕之
後者非也公豈惟不合於賈似道以前諸相皆不合也

故以是難進易退而常隱於書朝廷日少山林時多為
一世正人區區者幸獲末第則不可復見而公仙去矣
大抵嗜美仕者必廢書間居不仕必有讀書之暇是之
謂隱於書本無他奇說也銘其軒曰 太極儀象一畫
其初積奇乾益缺偶坤輿龍圖肇始鳥迹衍餘縱橫上
下左右實虛注缺觀止偏傍燦如字從意造文用言舒
恒性王播道心帝臚典謨淵渺誓誥枝疎三綱同軌六
藝異閭姬田既耒孔畎攸鋤宰柄八設治經九攄麟感

仁獸鳩歌摯睢百王藥石萬世菑畬周弗災矣秦乃藝
諸金馬天祿玉堂石渠漢大蒐采唐勤補苴曹庠儒館
冊府仙居縹囊蘭揭緗帙芸儲服其黼黻佩厥瓊琚歐
虞褚薛賈董嚴徐從列訪問相臣詔除安世三篋惠施
五車負笈擔簦釋屨離蔬刊削承亥改更魯魚化漸島
卉俗革戎鐻名達外史譯通象胥胡甘短製韓曳長裾
避逃廊肆憇偃郊墟商嶺綺季蔡津溺沮簡編塞棟卷
軸充廬經耕子鑿史畋集漁道咀德嚼理吸義噓市與

有虎突寧無駕豆芋糲飯韭菁寒菹是之取耳豈不偉
歟相如駟馬浩然蹇驢焉能挽我孰敢侮予畏影滅迹
刻名泯譽朱金糞土竹素璫璵筮曰未吉姑隱於書

月泉銘

陳深太博
陳著之子

四明陳汝資爲婺州月泉書院山長將行紫陽方萬里
爲言月泉之義以送之 泉出於地天一生之月出於
天日光所爲月之照物明發於外泉之照物清在於內
人之方寸其內至清至清無欲其外至明則兼有夫月

與水之光精者也故月之與水能照萬物之形而已而
心之在我則能照萬物之理焉是故君子之學莫大於
養心子方子回以告子陳子深

密齋銘

劉晦叔密齋方萬里既為記又為之銘曰 時行物生
機緘孰扣上天之載無聲無臭老安少懷端倪莫尋聖
人之道惟幾惟深生而知之如羲皇易洗心不用退藏
於密學而知之如節之初言語為階曾是可疏性同氣

異理一事萬氣有萬殊性則一貫補罅窒隙疎者密諸
矯弊揉偏其惟敬乎密之又密以幾於聖變化氣質而
純於性爰在卦中卦在著中吾之心亦猶是也以應天
下之萬事未嘗不明白而疎通

趙觀父石心銘

予與趙觀父邂逅於倪淵道之舍其自稱曰石心謂予
銘之銘曰 石之石木可以鑽金可以鑄火可以燃燭
可以穿夫何故石物也心之石不可鑽不可鑄不可穿

夫何故心非物也方寸之中有孔子不磷之堅而孟子
所謂浩然者也嘻其觀父富貴不淫貧賤不移終身勉
旃

謙山銘

易艮下坤上地中有山謙山高物也而在於地中高而
能下者也能下於人之謂謙是卦也六爻皆吉而彖則
又謂一謙而四益予先姑之孫劉子申所居負山予名
之曰謙山且書而為之銘曰 若古君子維正考父三

命循墻亦莫予侮彼其不然一命而舞山雖曰高高不
至天地有高者臨山之巔謙歟盈歟吾子勉旃

普福觀鐘銘

宣授清寧抱一凝妙法師提點普福觀開山住持靜境
居士周靜清築觀之十八年大德六年壬寅十月初四
日甲子鑄鐘高七尺徑四尺有六江東道紫陽山虛谷
居士方回為之銘曰 非氣無形非形無聲天以氣運
形聲風霆草木動盪山川震驚海毓萬彙有蒲牢鯨蒲

牢遇鯨厥音乃鏗鞀革為鼓不打不鳴槌以打之在人
手擊鑄銅為鐘不撞不轟人手撞之響撼穹清十洲三
島羣仙整纓大千世界弗夢弗醒幽陰黑暗罔魄弗寧
器而不用空有器名有以用之始為器成特懸大器撞
匪寸筵人手三合斯聳羣聽紙之墨之萬卷仙經度而
不讀疇通仙靈氣也利貞聲形元亨學我此道通誠復
誠

東平張才卿謙齋銘 并序

戒慎恐懼極恭致敬去高就下抱實若虛之謂謙然時義有六謙之不同全卦大象又不同何也以全卦及大象言之謙剝二卦皆五陰一陽而謙與剝三上相易剝之上乾之剝不盡者也今退而來三故曰天道下濟而光明濟互坎也光明艮也剝之三坤上也今進而往上故曰地道卑而上行謙剝一移換之間損上之有餘故虧盈變盈害盈惡盈益三之不足故益謙流謙福謙好謙其曰裒多益寡稱物平施皆取象三上相易尊而光卑而

不可踰則專指下體艮之三尊於一二艮止也所以光
山雖在地中而卑然誰能一蹴而越之謙之極致如此
非以盛德居大位未易臻此若夫時義六謙之不同則
當以無位有位論九三陽剛正而不中功臣之位也艮
體之上知止則可韓彭英盧不終光武功臣皆保其身
先儒以周公當此一爻非吾儕所敢望也六四相臣之
位也其曰撝謙功臣謙於下柔君謙於上一舉手間不
敢忽則吉也亦非吾儕所敢望也六五柔居尊位而陰

虛故曰不富惟謙也故不必富有力而能用四與上之
隣在二不應或猶不服利用侵伐謂謙德之至天下莫
敢當也非人臣之事也上六居高亢之位其曰鳴謙固
有聲矣而內應於三私也虛象也實象則以之用兵不
可以大得志也然則吾儕為士則當用初六自牧之謙
自之為言自己之學賤而在下無事任無功業無可矜
伐戒慎恐懼如牧牛羊自鞭其後此吾儕之所當為也
六二鳴謙以謙著聞士之已仕而為在下之臣者也於

五無應則未必見知於君上三剛乘我則勲闕之臣壓
乎吾上柔中而正則上不干尊位近不阿權勢貞固自
守中心泰然此一丈乃東阿張君才卿平昔之事也才
卿名宰相孫仕中原嘗字民百里佐幕二府過江一為
學官棄之今年六十有二以謙得名信乎鳴謙貞吉者
也昔吏今民鳴謙貞吉未之敢希則姑為初六之卑以
自牧者也愚讀易有年茲不揆緝諸家之說求教於才
卿而銘曰 君之學謙之初愚昔也窺無所為之謙也

自克自治省躬修己愈下愈卑君之仕謙之二愚昔也
知有所聞之謙也無應無隨守道循理不高不危學而
仕仕而學行止以時愚老矣不復仕則於初文之義退
而求之

箴

進德齋箴

凡物必不可無名有可以一字名者其有不可以一字
名者則不容不以二字名易六十四卦聖人豈不欲皆

以一字為名然噬嗑中孚同人无妄之類皆以二字為卦名意義貴乎足而無餘則名不容不二也人名州名縣名山名水名城名鄉村屋舍器用名飛潛動植凡萬物之名皆然士大夫齋名命意取義豈可不足實字而一言不若加虛字為二言而足之也惟仁與義若可以一字名如仁人義士云者若道與德以一字名則道人德士流於異端矣必合如程氏之明道先生晁氏之昭德先生以上虛一字為用力之地然後可儒者之學性

命心氣當致其知單舉特標曰性齋命齋心齋氣齋可
乎杭人陳吉甫以德名齋予友張仲實為作記其說固
亦雅矣予謂德之上當加一進字曰進德齋必如此而
又如張文潛所作進學齋記以用其進之力則得其
所以為德者矣仍為之箴曰 欲為仁人當居乎仁欲
為義士當由乎義仁人義士成德之名居仁由義所以
求進乎德而底於成猶之道也揭以道堂道宇道館道
室之號乃老子之所謂道耳吾儒則修道而後可以深

造故昌黎於彼曰道其所道德其所德將合仁與義言之則進與脩不可以不力

熙山箴

熙廣也心廣體胖可也自廣狹人可乎熙和也和順積中可也和節可乎武林蔡君潭浚父巍冠褒衣周規折矩其居無山而榜曰熙山有山無山不足計熙之名義不可不講也人惟有一心而天理人欲異焉如是而為天理可廣也不可狹也可和也不可拂也是之謂熙

之善者也如是而為人欲而廣充之而和同之則其所
謂熙得無不善乎紫陽方回為之箴曰 一字二義一
心二歧一理一慾一公一私此疆彼界其間毫釐曰廣
曰和古以訓熙浚父之山熙以命之可廣而廣無自狹
其當和而和罔敢拂而如秋宇廓如春日遲曠放迂闊
浮蕩娛嬉此則不可宜克宜治靜養動察惟敬之持欽
哉熙哉如之何勿思

一齋箴

并序

伏羲畫卦始初為一畫蒼頡製字厥初亦惟一字伏羲之一為奇為陽為剛為乾復配以一則為二為偶為陰為柔為坤揉其一而圓之為天圓折其一而方之為地方降而加之為兩儀為四象為八卦為六十四卦為四千九十六卦而萬萬無窮焉一實為之祖也蒼頡之一橫其一則有中有東左有西右縱其一而交之則為十而中心為中東左西右南上北下四方之位判焉加以四圍則為田而井田之制出焉帝王建國其中為都臣

庶立家其中為堂而負北嚮南左龍右虎之制出焉近之為尋丈遠之為千里萬里萬萬里無極焉一實為之主也然則伏羲之一即蒼頡之一而一畫之始一字之中乃天地人之心歟雖然論一之形畫與字是也論一之理心是也心之一敬是也誠是也敬之終事為誠誠之始事為敬故惟精惟一終始惟一協於克一聖賢屢言之至近世諸大儒有云主一之謂敬無適之謂一而又云不貳以二不參以三盡之矣故一分造化心起經

綸君子以為名言吾州祁門友人汪君元卿其祖母吾
宗伯吏部秋崖方先生之姑其姑嫁秋崖先生之弟生
子貢孫與予同壬戌榜其從姑嫁秋崖先生壬辰別頭
甲科文章氣槩名天下元卿學問有所自來比卜寓居
於金陵之北門扁曰一齋予輒以此發其一之之義而
箴之至其依郭負村穿池築圃山竒水異竹茂樹密風
高月朗烟化雲變之狀予尚能一詣其所為大篇以賦
之箴曰 伏羲之一畫卦攸始乾兌離震巽坎艮坤皆

根諸此蒼頡之一製字所起二三四五十百千萬俱出
於是字即是畫畫即是字一字中間天地人心厥象著
矣聖安而行賢者克己不左不右不南不北不偏不倚
執中傳心敬耳誠耳以此求仁以此貫道以此窮理天
以一燾地以一峙人保此一方寸之內純粹精美變化
百為酬酢萬事苟以不一差之毫釐繆以千里於斯一
齋左圖右史一在齋乎一在心乎告於汪子

古齋箴

并序

孔子定書始堯舜皆曰若稽古則此所謂古在堯之前至繫易推言伏羲神農黃帝又曰上古穴居結繩則此所謂上古又在伏羲之前邵堯夫經世書堯即位甲辰至今壬辰僅三千六百四十九年耳數雨箕沙古事何極而況堯以前之古乎經世以十二萬九千六百年為一元一萬八千年為一會三百六十年為一運三十年為一世堯之生當已會一百八十運之末去混沌始分之時已六萬四千八百年其果然乎漢書謂三統上元

至伐紂之歲十四萬二千一百九年又謂漢太初元年
距上元十四萬三千一百二十七年宋有一家星書謂
上元甲子之歲日在虛宿四度距景祐元年甲戌積一
千十五萬四千九百五十年劉道原通鑑外紀則謂開
闢至獲麟二百七十六萬年以此數書相較皆不可強
合然則堯以後年數可考堯以前年數不可考以孔子
定書繫易之意為法古之可以細考者自堯始古之可
以略考者自伏羲始伏羲以前之古鴻濛希夷先儒盤

古之說自不一端其莫可考也夫其亦不必深考也夫
濟南張君受益嘗以喜聞過名其齋予為之記又別為
古齋以扁其燕居之室而求箴焉予再四叩其說則曰
吾之所謂古不如是拘拘於年數之間也顧吾之好古
有三專心致志者得之讀觸目興懷者得之游寄情寓
意者得之玩古莫古於書籍易起一畫書首二典詩美
刺春秋褒貶吾精覽熟復以此四經為據決諸子諸史
諸集之醇疵是非三禮惟儀禮古而不完周禮為劉歆

竄改禮記雜漢儒言不純古近世朱氏四書吾服膺焉
以窺關洛之正傳異端邪說莫我敢伺庶幾見古人大
旨此一古也得之讀者也非專心致志不可也古莫古
於山川過鄒魯而知孔孟萬世永賴登泰山而想七十
二代之封禪與夫秦侈漢誇今皆安在堯平陽舜九疑
禹會稽后稷公劉豳邠文武豐鎬吾采其風聲而究其
所以治周九鼎輕而七雄並馳夕陽亭一言而十六國
迭起六朝宴安於江沱五季僭竊於遐僻吾臨其戰爭

之場而弔其所以亂齊景公不如西山之餓夫爾朱榮
不如湍石之嚴子勿拜之木不唾之地其骨秀其名芳
此一古也得之游者也觸目亦豈可少哉至如古器物
之好則王通嘗失言焉其言曰古之好古者聚道今之
好古者聚器器可聚也道如之何而可聚先儒固以此
譏河汾之不知道矣聚器之弊世誠有之古王者有天
球河圖赤刀琬琰離磬崇鼎諸侯有夏后氏之璜封父
之繁弱以為鎮國之寶後世不復知此陳庭之矢汲冢

之簡岐陽之鼓豐城之劍以資博識可也韓宣請環於子產魏丕求玉於吳質顧凱發羽化之驚桓玄輟寒具之設則少戇矣故蘇眉山於石幼安之畫苑王晉卿之寶繪堂直以為二子之病作記以諷之淳化閣帖黃長睿疵其半偽宣和博古圖洪景盧笑其多訛近日法書名畫以木刻御府名家印罔利於市自米元章已為無李論而所至山水圖輒以為真李成吾於此別其真贋博觀約取度藏一二時出閱之朋友取去亦無顧惜此

又一古也得之於玩而非玩物喪志之謂亦吾情之所
寄意之所寓而已非真有所執著於其間也然予深知
受益之為人當於古人中求耳勗古心行古道於古誼
尤高急人之私如救焚溺揚人之善如甘飴蜜又有在
於三好古之外者顧今人未盡知也箴曰 古書籍兮
吾其讀朝明窻兮夜殘燭嚙嚙雋永兮梯高邱感慨惻
愴兮瞠吾眸古聖賢之蹤可追兮吾捨是其將焉求古
器物兮吾其玩畧離邦益兮析豫楫渙吾聖師觀於廟

兮感歎器而永嘆苟貪多而鬪靡兮則未有積而不散
蘭亭之閱於辯才兮不知一旦有蕭翼也世已無昭陵
之真迹兮又焉知復有定武之石也形而下者有盡形
而上者無窮無窮之古撐腸飫胃有盡之古盍相與一
笑付之太空之風

勉齋箴

易稱伏羲神農黃帝書紀堯舜禹湯文武周公暨周衰
而有孔子自天地開闢以來歲年亦久矣生靈亦衆矣

而人之得號為聖人者不過此數人而已惟聖人不勉而中不思而得生知而安行者也下聖人一等則必擇善而固執學知而利行故論語一書無非聖人所以勉學者與夫學者自勉相勉之言今之人既不能自勉又不能交相勉間有一二能出一語以勉人則或者聞乎勉己之言深以為諱如是則甘于自愚而又相率天下之人皆為愚人而後可也潤之金壇張君光遠德輝其先高祖本濟南人是為南渡文簡公諱綱名臣也今德

輝以勉名齋與黃文肅公之齋名適同古之命名而同者多矣於齋名乎何嫌紫陽方回為之箴曰 騏驥之不行兮不如跛鼃之千里荆軻之猶豫兮不如蜂蠆之有尾飢食渴飲人禽同兮所不同者精義而明理辟穀服氣而長生兮寧朝聞道而夕死井九仞而不及泉兮山未成一簣而止浚之深而崇之高兮亦在乎勗之而已生知上聖固懸絕兮抑堯舜與人同耳愚可明而柔可強兮毋自咎乎質之不美吁噫美質固易得兮唯至

道其難聞學者之用其力兮非苦骨而勞筋初旁收而
並蓄兮博載籍而窮典墳外資師而取友兮內紬繹於
心君又繼之以明辨兮羌縷析而毫分四者至而誠不
篤兮將無墮於虛文致其知雖多途兮望聖涯尚其無
垠惟力行以終之兮在克艱而克勤吁嗟予求道之荒
唐兮夜若夢乎壇之杳覺而發其遺編兮童讀之雪領
自說樂不愠至知命兮垂萬世之深儆聖所以勉乎人
兮庸可求仁而僥倖顏拳拳於四勿兮曾孜孜於三省

賢所以自勉兮尤務理直而欲屏在子張之十九兮或
交勉之互請益苦口起死於膏肓兮而甘言平地之機
與竅嗚呼噫嘻物則秉彛兮人而不仁今之淺夫兮以
藝自珍小數狎物兮大閑踰身擇術未謹兮立言未醇
眩耀夸毗兮張皇鋪陳一語規之兮作色怒嗔不勉而
中兮惟古聖人汝不自勉又不欲人之勉己兮是之謂
橫目之凡民

觀省齋箴

善於觀天下之人不如自觀勤於省天下之務不如自省是謂近觀內省觀猶淺也省則深矣是者如此非者如彼或善或不善觀而見焉故曰觀之力猶淺也是者吾充廣之非者吾克治之必為善必不為不善省而擇焉故曰省之力則深矣此聖門心學也三衢毛君士穎以觀省名其齋紫陽方回為釋其義而寓之規曰心之未發鬼神莫窺寂然不動罔云罔為君子於此奚力之施敬以直內儼然若思心之既發矢去川決川不有

防矢不有括十目未覩獨見而察慎其獨也古之心法
我觀我心幾微之間我省我心非有二天視其所萌審
而後安此所以樂行憂違而慾淨理完者歟

稱隱齋箴

吾友汪君巽元讀書之所曰稱隱山房因為其齋作箴
焉物有輕重事有是非才有高下量有廣微銖兩千鈞
拱把十圍或塵而眇或岳而巍了然吾心不露其機鐸
此之扁鍵此之扉以區別品藻莫之敢違而所以抑揚

低昂亦莫或窺吾之幾也此聖人之能事而賢者之所
希蓋取舍與奪默識於內而臧否毀譽罔顯於外能隱
而不能稱則表裏一歸於聾瞶能稱而不能隱則黑白
察察者亦非所以避憂患而遠害是故胷臆貴乎明而
言論褒貶不可以不晦噫此巽之所以行權也在昔繫
傳九卦三陳巽以終之此一德也以處事接物待人自
履至井有八德焉先以此反己脩身八為經以窮而盡
性一為權斯精於義而熟於仁不然

原缺

賈而已耶豈

不能用權較錐刀之利卒為凡民

熟齋箴

并序

天之生物時至而熟百穀百果加灌溉之功焉則其熟也為尤美人之食物用物資於人力而熟烹庖牲牢煎臠魚鼈醢曝酒醬調膈鮓醢燠煨榛菽芋栗熬煉脂膏蜜飴炮炙附烏芥苓鍛冶金鐵銅錫煮治絲枲繅素矯揉皮革筋角得其所製之方所造之術而劑量斟酌之則其熟也為尤精其有習於當世之一能一技而熟者

古之人如伯牙之琴由基之射郢之斤扁之輪庖儻丈
人之承蜩庖丁之解牛扁鵲秦緩之醫李主唐生之卜
以至近世張旭之草書裴旻之劍舞米嘉榮之歌韓擇
木之隸李陽冰之篆吳道子曹霸韓幹之丹青董元李
成范寬之水墨諸葛鼠鬚之筆李廷珪潘谷松烟之墨
皆造玄極微以名於世雖邇日兵火更革善書善畫善
奕善算善方脈善占驗善說虞初九百亦往往不無習
熟之人而予嘗評之矣熟天之生物而至於美有人焉

畦叟園丁能之熟人之食物用物而至於精有人焉竈
鑿老媪市井淺夫皆能之熟當世之一能一技而至於
造玄極微亦有人焉然未必皆吾儕士君子之所可能
也苟如此則吾儕士君子之所熟者其將果何事耶潼
川楊廣文剛中以熟名齋紫陽方回為箴以遺之蓋以
明夫學聖賢之學者其所熟在此而不在彼也箴曰
德成而上士而熟其所當熟其不為聖賢者幾希藝成
而下士而熟其所不當熟則將無君子之棄而小人之

歸雖然熟於一藝閭閻之人足以養其身研於性命道德之學而熟於仁乃不免顏原之賤貧嗚呼吾寧熟於此而賤貧不願熟於彼而為閭閻之人

齊希說道存齋箴

并序

格物而物格致知而知至上用力下見效也齊君希說以道存名其齋其義甚大若曰存道而道存可乎飲食起居道未嘗不存百姓日用而不知學者欲用力以存道而見道存之效非也道也者不可須臾離視之無形

聽之無聲然道亦不在器之外老莊氏以道德而毀棄
仁義以有物混成先天地生為道而不以日用常行為
道似乎以有形有聲為累而欲返求乎寂滅恍惚歸於
無形無聲所以齊彭殤一死生吾之所謂道當然之理
必見於事本然之性必發於情君臣父子夫婦兄弟朋
友之倫立於天地之間而萬世不相紊者道在其中也
希悅於事之所施行察焉必不違乎當然之理於情之
所著見察焉必不戾乎本然之性由人已俱不睹不聞

以至於己獨睹獨聞一以敬存其心則可若乃泛然立
名謂吾存道而道存則渺茫濶大無所據依憑藉以為
身體力踐之地彼異端所謂孔子見溫伯雪子不言而
道存者無其事後世禪學有此吾儒烏有是哉此之存
亦非彼之存也故為詩以箴之曰 我飯一盂我飲一
觴我衽我衣我寢我床適口安體弗喪厥常道在於斯
罔有不臧事君以忠事父以孝夫婦閨門朋友學校兄
友弟恭是謂五教契為司徒上行下儆日用常行道無


不存不於堯明不於桀昏視聽言動此以物言四非四
勿乃以則論曰情之性曰事之理曰物之則顯用微體
匪珠匪玉可匱可匱我存我心敬而已矣

遜齋箴

并序

遜一作孫順也易云巽入也曰巽德之制曰巽稱而隱
曰巽以行權其義與而博文王三陳九卦之終事未究
也音同乎巽而字別曰遜則其義止於謙退不競而已
士之務進彼者非有甚高難行之事然順而遜亦可以

為成人矣濟南馬君名克敬字順之而又以遜扁其齋
其將以造於易之巽者乎紫陽方回為之箴曰 儉而
不奢之謂遜崇愷之步障不如平仲之豚肩也退而不
爭之謂遜陽勒之漚池不如伯倫之雞肋也謙而不伐
之謂遜季路之率不如趙文子之訥也恭而不敖之謂
遜原壤之夷不如正考父之僂也名曰敬主於內遜之
根字曰順行於外遜之文於斯扁齋曰遜入聖門然則
上天下 缺



桐江續集卷二十九